

Min benut dié belastingvoordeel vir aftree-spaargeld

Maarten Mittner, Johannesburg

Uittree-annulëite kry min aftrek by verbruikers ondanks die belastingvoordele wat die instrument bied. Ou Mutual se jongste Aftree-monitor wys net 10% van alle lede van pensioenfondse het 'n uittree-annulëite as 'n bykomende belegging.

Dit is deels verstaanbaar omdat 60% van die lede van pensioen-

fondse die fonds self as die vernaamste instrument vir aftrede gebruik.

Maar wanneer dit kom by mense wat nie lid is van 'n pensioenfonds nie, gewoonlik onderneemers of sake-eienaars waarvoor 'n uittree-annulëite besondere voordele kan inhou, maak net 15% hiervan gebruik.

Die vernaamste bron van aftree-inkomste word as kontant

aangegee. Dié monitor se bevindinge is gegrond op onderhoude met 1 051 werkende en afgetrede Suid-Afrikaners.

Hieruit blyk werkers benut ook nie 'n uittree-annulëite om hul pensioenfondsvoordele te beskerm wanneer hulle van werk verander nie.

Altesame 52% van die respondente het aangedui hulle het hul pensioenvoordele in kontant uit-

gekeer. Altesame 25% sê die geld is oorgedra na die nuwe werkgegewer se fonds terwyl 19% dit in die ou fonds kon hou.

'n Skamele 3% het aangedui hulle het hul aftreevoordele gebruik om 'n uittree-annulëite te koop.

Die monitor toon ook die gebrekkige aftreevoorsiening van die gemiddelde Suid-Afrikaner.

Altesame 77% van afgetrede

pensioenfondslede is bekommerd oor of hulle voldoende voorsiening vir aftrede gemaak het en 58% beplan om steeds ná aftrede te werk.

Altesame 26% het aangedui hulle kinders sal vir hulle moet sorg by aftrede.

Altesame 53% van die respondente het aangedui hulle het ná aftrede 'n daling in hul lewenspeil ondervind. Met tyd het die syfer

tot 75% aangegroei. Net 17% meen hul pensioen hou tred met inflasie en 23% ontvang bykomende hulp van kinders of ander familieledes.

Gebrekkige kennis oor hul aftreefondse blyk duidelik – 55% het aangedui hulle het geen benul wie die beleggings in hul fonds doen nie. Altesame 58% het aangedui hulle weet nie in watter bates die fonds hul geld belê nie.